

## 01

### 惜晚春应刘秘书诗

烟景抱空意，蘅杜缀幽心。  
心忧望碧叶，涵影顾青林。  
风光多树色，露华翻蕙阴。  
水苔方下蔓，石萝日上寻。  
霞衣已具带，仙冠不持簪。  
徒为多委郁，精魄还自临。  
始获琼歌赠，一点重如金。  
山中有杂桂，玉沥乃共斟。

## 02

### 秋夕纳凉奉和刑狱舅诗

萧条晚秋景，旻云承景斜。  
虚堂起青霭，崦嵫生暮霞。  
空居寂以欻，左右自幽歌。  
骑星谢屐尾，濯发惭阳阿。  
年歇玄圃壁，岁减天津波。  
金箫哀夜长，瑶琴怨暮多。  
四时通信黯，春风日夜过。  
楚水徒有兰，忧至竟如何。

## 03

### 冬尽难离和丘长史诗

閒居深怅怅，颼寒拂中闺。  
宝礼自千里，缣书果君题。  
山川吐幽气，云景抱长怀。  
兹别亦为远，潮澜郁东西。

汀皋日惨色，桂暗猿方啼。  
揽意谁侘傺，屑涕在心乖。  
杜蘅念无沫，石兰终不睽。  
冀总岁暮驾，游衍苍山蹊。

## 04

### 池上酬刘记室诗

戚戚忧可结，结忧视春暮。  
紫荷渐曲池，皋兰覆径路。  
葱茜亘华堂，葢葢杂绮树。  
为此久伫立，容易光阴度。  
水馆次文羽，山叶下暝露。  
怀赏入旧襟，悦物览新赋。  
惜我无雕文，报章惭复素。

## 05

### 采石上菖蒲诗

瑶琴久芜没，金镜废不看。  
不见空闺里，纵横愁思端。  
缓步遵汀渚，扬柁泛春澜。  
电至烟流绮，水绿桂涵丹。  
凭酒竟未悦，半景方自叹。  
每为忧见及，杜若讵能宽。  
冀采石上草，得以驻馀颜。  
赤鲤傥可乘，云雾不复还。

## 06

### 就谢主簿宿诗

季月寒气重，滋兰错无芳。

北风漂夜色，河凝皓如霜。  
怅哉心神晚，烛灭此深堂。  
菱衣如可赠，宁湿岨云梁。

## 07

### 当春四韵同□左丞诗

雷萌山中草，云煦江上花。  
流烟漾璇景，轻风泛凌霞。  
我有幽兰念，衔意瞩里斜。  
友人殊未还，独慰檐前华。

## 08

### 感春冰遥和谢中书诗二首 其一

江皋桐始华，敛衣望边亭。  
平原何寂寂，岛暮兰紫茎。  
芬披好草合，流烂新光生。  
冰雪徒皦洁，此焉空守贞。

## 09

### 感春冰遥和谢中书诗二首 其二

暮意歌上眷，怅哉望佳人。  
揽洲之宿莽，命为瑶桂因。  
观书术不变，学古道恒真。  
若作商山客，寄谢丹水滨。